


CELEBRACIÓN EN OS COTOS (na casa)

4 – 5 de xullo do 2020

XIV DO TEMPO ORDINARIO



NON MÁIS
VIOLENCIA
DE XÉNERO



OS COTOS COA IGUALDADE VERDADEIRA DAS PERSOAS,
COS POBOS QUE SOFREN INJUSTIZA E ABANDONO,
COS REFUXIADOS E MARXINADOS DA SOCIEDADE,
E COA NATUREZA MALTRATADA



1

1.- ENCONTRO EN FAMILIA

SAÚDO DE BENVIDA

Celebrante: Benvidos sexamos todos a esta celebración, na que o evanxeo nos amosa como Xesús acollía a todos e dun xeito especial aos cansos e agoniados.

Na nosa sociedade actual temos moitos prexuízos para as persoas que non coñecemos, e sobre todo daquelas persoas que son distintas a nós pola súa forma de ver a vida. Marxinamos aos estranxeiros por seren doutra terra e pola cor da súa pel. Marxinamos aos vellos pola súa forma de pensar e dicir. Desprezamos as xentes do rural por non ter os mesmos medios. Desprezamos as mulleres, polo seu sexo “feble”. Desprezamos e marxinamos aos pobres, aos famentos e aos refuxiados.

Como cristiáns, seguidores de Xesús, temos que actuar como El: “Achégádevos a min os que estades cansos e oprimidos e eu vos aliviarei”. Esa ten que ser a nosa actitude e o compromiso que facemos nesta celebración: deixar de lado os prexuízos e as marxinacións, e estar abertos a acoller e a estar á beira de quen máis nos necesita.

Reunímonos para acoller a Xesús na Eucaristía e facémolo no nome do Pai e do Fillo e do Espírito Santo.

🎵 *nº Unha xuntanza de amor*

2

Celebrante: *Estes tempos difíciles fixeron que nos deamos conta da importancia que ten compartir e acoller. Hoxe, con Xesús, queremos bendicir ao Pai dándolle grazas por todos os bens que nos concede, pedímoslle perdón e comprometémonos a ser acolledores:*

Monitor/a

➤ *Comprometémonos con Xesús a vivir dende a actitude da acollida, tolerancia e respecto?*

SI, COMPROMETÉMONOS

➤ *Comprometémonos con Xesús a esforzarnos por dar unha man e non virarlle as costas ás persoas marxinadas e desprezadas na nosa sociedade?*

SI, COMPROMETÉMONOS

➤ *Comprometémonos con Xesús a seguir o seu exemplo de acollida cos máis necesitados e esquecidos, nos que sofren máis preto a pandemia do Covid 19?*

SI, COMPROMETÉMONOS

Celebrante: *Deus todopoderoso teña piedade de nós, dos que teñen un lugar nos nosos corazóns e na nosa vida, e dos que se senten doídos e agoniados por unha pandemia que se levou demasiada vida. A todos, o Señor, nos conceda o perdón e nos leve á vida eterna. Amén.*

ORACIÓN PROPIA DO DÍA

Celebrante: *Rematamos a primeira parte da celebración confiando nas mans de Deus Pai a nosa oración e agradecemos todas esas veces que alguén foi acolledor con nós.*

(silenzo)

Deus, Noso Pai,
pola vida do teu Fillo ti ofrécesnos unha man cando nos sentimos decaídos.
Concédenos aos teus fieis a túa santa esperanza, ti que nos liberaches da escravitude do pecado, e fainos partícipes da alegría da vida eterna.
Pedímoscho por Xesucristo, noso irmán, que vive e reina por sempre eternamente.

2.- PROCLAMACIÓN DA PALABRA DE DEUS

(sentad@s)

Monitor/a: *As Palabras de Xesús no Evanxeo de hoxe son para nós un motivo de esixencia na responsabilidade que temos con respecto a Deus e aos outros. Tamén nestes momentos se nos pide responsabilidade persoal e coherencia para seguir coidando a nosa saúde e a dos demais. Aquí está o cerne de evanxeo e da acollida.*

LECTURA DO LIBRO DO PROFETA ZACARÍAS

Relouca, filla de Sión,
grita de ledicia, filla de Xerusalén.
Velaí chega o teu rei,
é xusto e protexido do Señor,
humilde e montado nun burro,
sí, nun burriño fillo dunha burra.
Eu acabarei cos carros de Efraím
e cos cabalos de Xerusalén,
acabarase o arco de guerra
e El anunciará a paz ás nacións,
reinará desde un mar a outro mar,
desde o Éufrates ós confíns da terra.

Palabra do Señor

🎵 *nº Andarei na presenza do Señor*

SALMO

(en pé) *Leccionario I A páx 219 Mt 11,25-30 EVANXEO*
PROCLAMACIÓN DO SANTO EVANXEO
SEGUNDO MATEO

Daquela dixo Xesús:

-Bendito sexas, meu Pai, Señor do ceo e mais da terra,
porque lles escondiches estas cousas aos sabios e aos
prudentes e llas revelaches á xente humilde.

Si, meu Pai, bendito sexas por che agradecer iso así. Meu
Pai ensinome todas as cousas e ninguén coñece ao Fillo
agás o Pai, nin coñece ao Pai agás o Fillo e aquel a quen
o Fillo llo queira revelar.

Achegádevos a min todos os que estades cansos e
oprimidos, que eu vos aliviarei. Cargade co meu xugo e
aprendede de min, que son bo e humilde de corazón e
atoparedes acougo para as vosas vidas; porque o meu
xugo é levadeiro e a miña carga liviá.

Palabra do Señor

(sentad@s) gardamos uns instantes de silencio para acoller
a palabra no corazón



Neste momento sería bo recordar a aquelas persoas polas que sentimos non poder estar con elas: familiares, amigos, xente coa que compartíamos as celebracións...

Ver a forma de poder seguir estando en contacto con elas aínda que non podamos velas.

Facer propósito de non perder esas relacións humanas tan necesarias para todos.

Xa que o Evanxeo de hoxe nos mostra a Xesús dando grazas ao Pai, que tamén nós lle deamos grazas por tantos bens que recibimos cada día sen darnos conta e aprendamos a ser humildes e sinxelos coma El con todos.



(en pé) PROFESIÓN DA FE

Celebrante: *Neste encontro parroquial, sabendo Pai que Ti sempre estás á nosa beira, despois de escoitar a Xesús, tamén nós queremos ser acolledores e por iso dicimos.*

Creo, Señor, pero aumenta a miña fe

Monitor/a

Credes en Deus, Pai que nos creou á súa imaxe, que nos ama a todas as persoas sen facer diferenzas?

Creo, Señor, pero aumenta a miña fe

Credes en Xesús, que quixo compartir a nosa vida, que o fixo sentíndose irmán con todos, e que con palabras e feitos nos convida a acoller aos cansos e oprimidos?

Creo, Señor, pero aumenta a miña fe

Credes no Espírito de Deus, que nos dá forzas para facer e sentirmos unha comunidade na que todos somos importantes e necesarios?

Creo, Señor, pero aumenta a miña fe

Credes na Igrexa, comunidade bendicida polo exemplo de tantos homes e mulleres que viven acollendo aos demais, sen importarlles a súa forma de pensar, vivir ou as súas crenzas?

Creo, Señor, pero aumenta a miña fe

ORACIÓN UNIVERSAL

Celebrante: *Movidos pola fe que compartimos, imos rezar xuntos coma comunidade dicindo:*

Señor, acóllenos contigo.

Monitor/a

1. Pedimos pola igrexa para que supere a tentación de creerse mellor, e medre sementando paz, tolerancia, e igualdade, oremos

2. Pedimos polas persoas que están tiradas á beira do camiño, que están deixadas de lado, e ás que poucos se achegan, oremos

3. Pedimos polos pais e nais para que axuden a medrar aos seus fillos, non dende a competencia para ser máis que os demais, senón dende as actitudes de acollida, igualdade e respecto a todo e a todos, oremos

4. Pedimos por nós para que non calemos ante os sufrimentos nos que malviven tantas persoas. Poñamos todos esforzos para a paz, oremos

5. E pedimos polas nosas familias, para que sexamos comunidades acolledoras, onde cadaquén se sinta ben tratado, oremos

Celebrante: *Grazas Señor porque hoxe, coma sempre, estás á nosa beira escoitándonos e acolléndonos. Ti que vives e reinas por sempre eternamente. Amén*

3.- OS SIGNOS DA COMUÑÓN CON DEUS EN FAMILIA

NOSO PAI

Celebrante: *Como Xesús reza agradecido ao Pai no Evanxeo de hoxe, nós tamén o queremos facer sabéndonos acollidos nas mans do noso Pai:*

NOSO PAI ...

SIGNO DA PAZ

Celebrante: *Xesús dános paz coas súas palabras. Que nós saibamos dar esa mesma paz a todos aqueles que a sociedade ten menos en conta e se senten cansos da vida.*

NON COMULGAMOS PERO ESTAMOS EN COMUÑÓN

Celebrante: *Na nosa celebración da fe compartimos coma familia. Participar hoxe é amosar que somos acolledores con todos ou non somos crentes en Xesús.*

Ditosos nós que en familia queremos encontrarnos con Deus.

4.- AVISOS E DESPEDIDA

ORACIÓN FINAL

Celebrante:

Oremos: Señor, dámosche as grazas por todas as persoas que no camiño da nosa vida son capaces de comprometerse de verdade estando á beira dos que máis problemas teñen.

Agradecemos a vida de quen din: “vinde a min todos os que estades cansados e agoniados que eu terei parte con vós”.

Grazas polo exemplo que nos dás en Xesús, o teu fillo benquerido, que vive e reina con nós por sempre eternamente. Amén.

Con Xesús queremos dar grazas pola vida sinxela das nosas aldeas

Con Xesús comprometémonos a vivir acollendo a quen o necesite

Con Xesús bendicimos a Deus Pai por revelarnos o seu Evanxeo, non aos sabios e poderosos, senón aos pequenos e humildes como celebramos hoxe na casa.

***Que teñamos un bo día, unha boa semana,
e o Señor nos bendiga, † nos garde de todo mal
e nos leve ao seu fogar de vida eterna. Amén.***



**“ Bendito sexas, meu Pai, Señor do ceo e mais da terra,
porque lles revelaches estas cousas á xente humilde.
Achegádevos a min todos os que estades cansos e
oprimidos, que eu vos aliviarei.”**

Palabras de Xesús no evanxeo de hoxe.